

Kalau Iman Dah Mendalam, Hukuman Gantung Disambut Dengan Senyum.

Sayyid Quttub Bersama Tiga Orang Anggota Ikhwān Al-Muslīmīn Digantung Di Mesir

Sekalipun Seluruh Dunia Islam Menjerit Meminta Timbang Rasa

Di dalam masa dunia Islam ribut mengutus telegram kepada Gamal Abdel Nasser supaya

hukuman gantung yang dijatuhkan kepada seorang ulama dan sarjana Islam yang terkemuka di seluruh dunia diringankan yang diputuskan oleh Mahkamah Keamanan Negara Mesir pada 22 Ogos, seminggu kemudiannya iaitu pada 28 Ogos, dengan tidak memperdulikan permohonan dan dengan tidak memberikan timbang rasa atas perhatian dan permohonan umat Islam seluruh dunia, sarjana yang banyak jasanya itu dinaikkan ke tiang gantung syahid – innā lillāhi wa innā ilayhi rāji‘ūn.

(oleh Abdullah bin Hamid Al-Edrus)

Hukuman gantung yang dijatuhkan
ke atas mujahid yang besar ini
disambutnya dengan tersenyum sehingga
menakjubkan seluruh dunia. Mengapa?
Ini telah dikatakan oleh al-shahīd ini
dengan katanya di dalam pendahuluan
tafsir Fī Zilāl Al-Qur’ān dengan
katanya: “Sejak aku hidup
di bawah naungan Al-Qur’ān aku dapat
melihat rahsia-rahsia kejadian alam dengan
lebih jelas, aku dapat melihat bukan
hanya satu alam, tetapi dua alam
yang berlainan corak dan bentuknya
iaitu alam dunia dan alam akhirat...”

“... manusia dijadikan
bukan hanya sekadar untuk hidup
di alam dunia sahaja tetapi ia akan
hidup lebih lama dan kekal di alam
akhirat...”

“... mati itu bukanlah
penghabisan hidup, tetapi ia
adalah pertengahan jalan untuk menuju
kehidupan yang kekal abadi.”



Al-Shahīd Sayyid Qutb salah seorang pengajur persatuan al-Ikhwān

al-Muslīmīn sedang mendengar keputusan hukum gantung yang dijatuhkan oleh

Tuan Hakim Mahkamah Keamanan Negara di Kaherah ke atasnya dengan perasaan hati

yang tenang dan air muka yang senyum.

Inilah kata-kata semenjak dari dahulu daripada al-shahīd. Ini adalah menunjukkan ketetapan hati dan imannya menghadapi sesuatu di dalam masa ia berjihad menegakkan kalimah Allah yang difaham dan diyakininya mengikut ajaran Rasulullah (S.A.W).

Dengan peristiwa pembunuhan Sayyid Qutb bersama-sama tiga orang rakannya adalah menunjukkan bukti salah satu daripada langkah Gamal Abdel Nasser selama memerintah untuk menghapuskan musuh-musuhnya dari akar umbinya iaitu pertubuhan Ikhwān al-Muslimīn yang telah membela dan membina hidupnya semangat Islam di bumi Mesir khususnya dan di dunia Islam amnya yang dahulukan¹ oleh ketuanya yang telah syahid juga iaitu Al-Shaykh Hassan Al-Banna yang telah ditembak oleh golongan-golongan yang mungkin rakan sejawat Gamal Abdel Nasser sendiri.

Tidak itu sahaja tetapi di dalam langkah yang pertama, sesudah kekuasaan diambilnya, seorang ulama besar yang menjadi anggota Ikhwān al-Muslimīn, seorang sarjana yang terbesar di dunia Islam Al-Shahīd Abdul Qadir Audah juga dinaikkan di tiang gantung oleh Gamal Abdel Nasser. Perbuatan membunuh Abdul Qadir Audah kononnya disesali oleh Gamal Abdel Nasser tetapi sejarah bergelimang darah, sejarah membunuh saudara-saudaranya umat Islam berulang semula apabila dilakukan terhadap kepada Sayyid Qutb, Muhammad Yusuf Huwasy dan Abdul Fatah Ismā'il, korban keganasan Gamal Abdel Nasser untuk menghapuskan anasir-anasir yang menegakkan cita-cita dan perjuangan Islam di tanah Mesir untuk menghidupkan semangat sosialisnya



Al-Shahīd Sayyid Qutb

Selagi umat Mesir masih berpegang teguh kepada ajaran kitab Allah dan sunnah Rasul-Nya fahaman sosialis Gamal tidak dapat diterima.

“Perbuatan ini sangat memalukan umat Islam kerana orang Islam sendiri menindas gerakan untuk menegakkan pemerintahan Islam” – kata Tuan Inamullah Khan di dalam majlis tabayan² yang dianjurkan oleh Qalam bahagian tabligh.

Sesudah berlaku pemberontakan maka pada tahun 1954 Ikhwān al-Muslimīn diharamkan dan anggota-anggotanya ditangkap termasuk Sayyid Qutb dan pada masa itulah al-Shahīd Abdul Qadir Audah bersama-sama dengan lima orang rakannya dinaikkan ke tiang gantung. Sayyid Qutb dipenjarakan dan di dalam masa di penjara itulah ia menulis tafsirnya yang bernama “Fī Zilāl Al-Qur’ān” (Di Bawah Naungan Quran). Sesudah beberapa lama ditahan dan dilakukan perbicaraan Sayyid Qutb dilepaskan tetapi Gamal Abdel Nasser tidak berpuas hati atas pengaruh-pengaruh orang-orang perseorangan yang menjadi bekas anggota Ikhwān al-Muslimīn itu. Dengan kerana itu pada tahun 1964;

sudah Mesir mengumumkan perlombagaan dan pentadbiran awam lalu mengambil kuasa membolehkan president (Gamal Abdel Nasser) membicarakan ahli-ahli siasah yang disyaknya dengan tidak dibicarakan dan mengambil kuasa berhak merampas harta benda orang yang ditangkap itu.

Dengan kuasa-kuasa yang demikian inilah Gamal Abdel Nasser bekerja membuat langkah-langkah menghapuskan bekas-bekas anggota Ikhwān sehingga kekar-akarnya yang dimulanya pada tahun 1965 iaitu Gamal Abdel Nasser telah menangkap 30,000 orang yang dikatakan anggota Ikhwān al-Muslimīn termasuk 700 orang perempuan dikurung di dalam penjara. Sayyid Qutb seorang daripadanya.

Tuduhan-tuduhan yang berat dihadapkan kepada Sayyid Qutb bahawa al-shahīd ini merancangkan suatu rancangan untuk membunuh President Gamal Abdel Nasser pada 4 Ogos 1965. Mulanya suatu perkara yang dikatakan perbicaraan dijalankan dan ditunjukkan di dalam televisyen. Tetapi apabila yang dituduh menjelaskan yang mereka disuruh membuat pengakuan dengan mereka diseksa dan diazab (torch) maka dari semenjak itu kandungan perbicaraan digelapkan.

Apabila bekas Yang Dipertua daripada Persatuan Peguam-Peguam Perancis, Tuan William Soroff dan seorang peguam Belanda A.G.M Dandald dikehendaki hadir sebagai peguam Sayyid Qutb, permintaannya ditolak. Dua orang peguam dari Sudan datang hendak menjadi peguam bagi Sayyid Qutb, peguam-peguam dari Sudan ini dihalau keluar negeri.

Tuan Peter Archer seorang ahli

¹ Perkataan sebenar ialah didahulukan

² perkataan diteka dengan tabayan; bayan merupakan majlis penerangan untuk jemaah tabligh

Amnesty International (suatu badan yang bukan politik bersedia membela seseorang yang telah dituduh kerana difikirkan tidak bersalah) telah datang ke Kaherah membuat penyiasatan di dalam perkara ini, di dalam penyataan di antara lain-lain berkata:

(1) Dengan undang-undang khas yang diumumkan pada 24 Mac 1964,

kerajaan Republik Arab Bersatu memberi kuasa kepada president menahan seseorang dengan tidak ada perbicaraan yang dituduh melakukan kesalahan-kesalahan siasah. Tangkapan-tangkapan siasah ini akan dibicarakan di sebuah mahkamah yang ahli-ahlinya dilantik oleh president. Di dalam amalannya yang demikian ini ialah suatu badan mahkamah tentera dan hak-hak menjatuhkan hukuman adalah disahkan oleh president.

(2) Di dalam perbicaraan di dalam bulan Januari dan dua perbicaraan lagi pada 2 Februari, perbuatan-perbuatan menyeksa (torcher) untuk membuat pengakuan telah dijelaskan oleh yang dituduh. Yang demikian telah disebut juga oleh Sayyid Qutb yang menjadi ketua bagi orang-orang yang dituduh. Yang Dipertua



Al-Shahīd Sayyid Qutb sedang diiringi oleh beberapa orang pembesar-pembesar polis masuk ke mahkamah.

mahkamah dengan segera menyuruh yang dituduh diam dan tidak mahu mendengar keterangan saksi-saksi yang dikatakan mereka adalah pengakuan itu bohong.

(3) Sayyid Qutb dan lain-lain ahli Ikhwān tidak dibebaskan boleh memilih seorang peguam untuk mempertahankan mereka. Dalam bulan Februari dua orang peguam Sudan telah terbang ke Kaherah untuk mempertahankan sebahagian daripada yang dituduh. Dengan satu keputusan daripada Kongres Peguam-Peguam Arab pada bulan November 1965 dan disokong penuh oleh Pertubuhan Peguam-Peguam Mesir dan tersebut di dalam undang-undang Mesir, peguam-peguam Sudan adalah berhak hadir di dalam mahkamah-mahkamah Mesir. Tetapi mereka telah dihalau keluar dari Mesir dengan tidak ada penjelasan dan dengan tidak dibenarkan menjumpai anak-anak guamnya.

(4) Suratkhabar-suratkhabar dan orang ramai tidak dibenarkan mendengar perbicaraan itu semenjak perkara penganiayaan pertama disampaikan. Maklumat-maklumat hanya diberikan menerusi jabatan-jabatan rasmi kerajaan sahaja. Tuan Archer sendiri tidak dapat hadir di dalam perbicaraan-perbicaraan itu walaupun ia dijemput duduk di Kaherah di dalam

masa menunggu permohonannya dipertimbangkan.

Dengan tidak mahu membuat apa-apa ulasan atau menyebut perkara-perkara yang menyusahkan yang dituduh, pertubuhan Amnesty Internasional ini sangat berduka-cita di dalam masa perbicaraan itu tidak dapat mendengar segala tuduhan-tuduhan penganiayaan dan yang demikian menimbulkan kehilangan kepercayaan keadilan di dalam Mesir. Pertubuhan ini menyeru kepada kerajaan Mesir untuk menghormati hak-hak asasi kemanusiaan terhadap kepada yang dituduh dan membenarkan perbicaraan yang adil untuk mendapat pandangan daripada dunia internasional.

Apakah Kata Sayyid Qutb Atas Tuduhan Gamal Abdel Nasser?

Al-Shahīd Sayyid Qutb telah pernah membuat suatu kenyataan mengenai dengan rahsia-rahsia langkah-langkah Gamal Abdel Nasser dan rakan sejawatnya menghadapi anggota-anggota Ikhwān al-Muslimīn yang demikian tersebar di dalam akhbar “Al-Nadwah” yang diterbitkan di kota suci Makkah. Sayyid Qutb pernah berkata: **“Saya tidak pernah berniat atau bercita-cita untuk membunuh President Gamal Abdel Nasser.**

Segala berita yang disiarkan mengenai



Seorang polis sedang memasang gari ke tangan al-Shahīd Sayyid Qutb dan Yusuf Huwasy.

perkara tersebut adalah dusta dan dibuat-buat”

Seterusnya al-shahīd itu

menambah kata: “Tetapi walau bagaimana pun, saya adalah selamanya tetap menentang pemerintahan Gamal Abdel Nasser dengan sebab-sebab yang tersebut di bawah ini:

(1) Sesungguhnya revolusi 23

Julai 1952 adalah suatu revolusi yang dipelopori – dalam peringkat yang pertamanya – oleh persatuan al-Ikhwān al-Muslimīn.

Pembesar-pembesar tentera yang bergabung di dalam persatuan al-Ikhwān al-Muslimīn lah

yang menjadi tulang belakang revolusi tersebut, dengan dibantu oleh anggota-anggota

persatuan al-Ikhwān al-Muslimīn yang mempunyai pengaruh di kalangan masyarakat, yang bilangan mereka bermilion-milion, yang terlatih bermain senjata dan pernah bertempur di medan perang Palestin – sebagaimana yang diketahui oleh semua orang – saya berani berkata

anggota-anggota dari persatuan al-Ikhwān al-Muslimīn lah yang membangkitkan semangat revolusi dengan bersandar kepada bantuan dan sokongan rakyat. Kalau tidak

kerana kukuhnya perlindungan yang diberikan oleh anggota-anggota persatuan

al-Ikhwān nescaya pihak tentera tidak akan berjaya merampas kuasa dan menamatkan revolusi. Begitulah


anggota-anggota al-Ikhwān sama ada mereka itu berada di dalam tentera maupun di kalangan rakyat

jelata mereka lah yang mencetuskan revolusi. Kemudian setelah

revolusi berjaya datanglah Gamal Abdel Nasser dan kawan-kawannya merampas

revolusi yang telah berjaya itu

dari tangan persatuan al-Ikhwān



Al-Shahīd Sayyid Qutb dan al-Shahīd Yusuf Huwasy berada di dalam kandang orang salah di mahkamah.

al-Muslimīn.

(2) Ketika kami mencetuskan revolusi 23 Julai 1952 di antara kami dengan pihak tentera telah bersetuju untuk menubuhkan sebuah kerajaan yang bercorak Islam, kerana kami berkeyakinan penuh bahawa Islam boleh mengatasi masalah-masalah yang dihadapi oleh rakyat dari segi ekonomi, politik dan masyarakat. - Ini telah dapat dilihat dengan nyata pada masa pemerintahan Islam di zaman Rasulullah dan dua sahabatnya Abū Bakar dan ‘Umar rađiya Allahu ‘anhuma – tetapi Gamal Abdel Nasser yang merampas revolusi kami itu pada akhirnya menentang Islam; dan terus beliau meminjam konsep dari negara asing dengan berpandukan konsep Marx dan Lenin, malahan dalam masa yang akhir-akhir ini beliau terus mengimport konsep Marx dari Rusia dan China komunis dan mendidik pemuda Islam dengan menggunakan pendidikan Marx yang menyekutukan Tuhan, dan

Konsep komunis ini terus menerus menguasai jentera-jentera kerajaan dengan bersandarkan nama persatuan socialist hingga Persatuan Socialist Mesir ini terletak di bawah konsep Marx. (3) Ketika kami mencetuskan revolusi 23 Julai 1952 kami telah berazam menjadikan Mesir sebuah negara yang berdasar Islam dan masuk di dalam blok negara-negara arab kemudian memasuki blok persatuan negara-negara Islam, dengan menggunakan siasah bertolak ansur dan berlemah lembut mengikuti siasah yang dilaksanakan oleh Rasulullah ﷺ Allāhu ‘alayhi wa sallam dan sahabat-sahabatnya yang mulia, tetapi Abdel Nasser yang telah merampas kekuasaan revolusi dengan segera berpaling kepada siasah kejam dan zalim dengan mendewa-dewakan keagungan seseorang penganjur dengan secara palsu. Sebab-sebab utama yang menjatuhkan ekonomi Mesir ialah setelah Gamal menggunakan siasah

kejam dan kekerasan dengan menumpahkan darah orang-orang Islam di Yaman, kemudian membawa kepada gagalnya rancangan-rancangan, atau projek-projek yang telah diatur oleh revolusi rakyat Mesir yang sebenarnya, iaitu menuju kepada persatuan negara-negara Islam. Tetapi siasah kekerasan yang dilaksanakan oleh Gamal dalam masa yang akhir-akhir ini menyebabkan seluruh rakyat Mesir terjauh daripada tujuan revolusi yang mulia dan membawa kepada negara-negara arab dan Islam menjauhkan diri daripadanya, terutamanya setelah Gamal melaksanakan konsep Marx dan Lenin dalam menjalankan pemerintahan negara Mesir.

(4) Ketika kami mencetuskan revolusi 23 Julai 1952 kami berazam akan menjadikan Mesir sebuah negara yang berdasar demokrasi yang tulen sejati dengan menggunakan dasar “syura” sebagaimana yang tercatit nasnya di dalam kitab suci al-Qur’ān al-Karīm. Tetapi Gamal Abdel Nasser yang telah merampas kekuasaan revolusi itu telah menggantikan hukum demokrasi yang berdasarkan “syura” itu kepada suatu cara peraturan diktator polis yang kejam yang tak pernah terjadi di dalam sejarah Mesir.

(5) Ketika kami mencetuskan revolusi 23 Julai 1952 kami telah berazam memperkuuhkan siasah dalam negeri Mesir dengan menggunakan dasar-dasar dan peraturan-peraturan Islam, dengan tujuan untuk menentang Zionis dari segala jurusan.

Kami sentiasa percaya kepada kekuatan orang-orang Islam berjuang untuk mencapai kemenangan, sekalipun kami mengetahui dan dapat mengukur

kekuatan yang ada pada bangsa Yahudi yang selalu bersandar kepada kekuatan orang lain.

Kami yakin bahawa Islam dan pengikut-pengikut agama Islam yang beriman kepada Allah lebih kuat daripada segala kekuatan yang ada pada orang Yahudi Zionis, lebih gagah daripada segala kegagahan yang ada pada pihak-pihak yang menyebelahi Yahudi.

Tetapi amat mendukacitakan Gamal Abdel Nasser yang telah merampas kekuasaan revolusi dari tangan

kami telah berpaling tada dari rancangan-rancangan suci yang yang telah kami atur, ia membelakangkan Islam dan mengeneplikan akidah Islamiah dan seterusnya mengharamkan pengikut-pengikutnya, yang terdiri dari bangsa Arab yang beragama Islam daripada menggunakan setajam-tajam senjata untuk menghadapi Yahudi Zionis dan penjahat barat iaitu iman yang diselaputi dengan akidah Islamiah yang tebal.

Inilah sebab-sebab yang menjadikan saya terus menerus menentang



Sayyid Qutb dan rakan-rakannya sedang dibicarkan di dalam Mahkamah Keamanan Negara di Kota Kaherah Mesir.

pemerintahan Gamal Abdel Nasser. Saya bersumpah bahawa saya sentiasa berpegang teguh dengan ajaran-ajaran al-Qur'an. Oleh itu saya menafikan dengan sekeras-kerasnya penafian yang saya telah mengadakan suatu komplot untuk membunuh Gamal Abdel Nasser atau berniat untuk membunuhnya, kerana saya mengetahui bahawa Islam tidak mengharuskan seseorang penganutnya melakukan huru hara dan pembunuhan."

Siapa Sayyid Qutb ?

Sayyid Qutb ialah seorang pemimpin Ikhwān al-Muslimīn yang telah dijatuhkan hukuman bunuh pada 22 Ogos 1966 dan digantung pada 28 Ogos. Al-shahīd diperanakkan pada tahun 1906 di daerah Asyuth di Mesir. Al-shahīd telah hafaz Qur'an dan sesudah menuntut di sekolah permulaan di daerahnya pada tahun 1929 al-shahīd pergi ke Mesir dan mendapat syahadah pada tahun 1933. Al-shahīd telah masuk berkhidmat kepada kerajaan di dalam jabatan pelajaran.

Pada tahun 1949 al-shahīd telah dihantar ke Amerika Syarikat untuk mendapat latihan tinggi dan telah kembali ke Mesir pada tahun 1951 dan dilantik menjadi nazir sekolah-sekolah. Sebelum itu al-shahīd telah nampak bayangannya sebagai seorang ahli fikir dan seorang penulis. Buku yang pertama diterbitkan pada tahun 1948 dan mendapat sambutan yang luar biasa. Dalam masa baliknya daripada barat al-shahīd menulis sebuah buku yang menunjukkan kekosongan kebendaan orang-orang barat dengan nama "Ma'rikat al-Islām wa al-Rā'asmāliyyah" (Perjuangan Di Antara

Islam Dengan Kebendaan).

Al-shahīd juga mempercayai bahawa keselamatan muslimin hanya terletak di dalam ajaran Islam dan dengan kerana itu maka al-shahīd menyatukan dirinya di dalam pertubuhan Ikhwān al-Muslimīn yang diketuai oleh al-Shahīd Hassan Al-Banna dan disertai oleh al-Shahīd al-Shaykh Abdul Qadir Audah yang digantung oleh Gamal Abdel Nasser.

Dengan ini mulailah al-shahīd menulis di dalam majalah mingguan Ikhwān al-Muslimīn yang bernama "Al-Da'wah". Sesudah melawat di Syria dan di Jerusalem pada tahun 1952 maka al-shahīd dilantik menjadi setiausaha yang bertanggungjawab kepada penerbitan Ikhwān al-Muslimīn pada tahun 1952.

Sebelum al-shahīd ditangkap pada tahun 1965 kerajaan telah menawarkan kepadanya menjawat jawatan taraf menteri di dalam pelajaran. Tetapi al-shahīd menolak kerana tidak sesuai dengan dasar-dasar pelajaran yang diketahui tidak didasarkan mengikut ajaran Islam.

Al-shahīd adalah seorang penulis besar yang telah menulis 21 buah kitab agama yang di dasarkan di atas dasar-dasar Islam yang membuka mata dunia Islam supaya menyedari betapa golongan-golongan dan puak-puak Islam yang bertopengkan Islam bekerja untuk menghancurkan Islam dari dalam.

Adakah Gamal Abdel Nasser dan kumpulannya akan berfikir bahawa syuhada-syuahada daripada anggota Ikhwān al-Muslimīn yang telah digelumanginya dengan darah, yang telah dianiayainya seakan-akan

Hitler memperkosa orang-orang Yahudi di Jerman dahulu, terhadap saudara-saudara sedarah sedaging dan saudaranya Islam akan hapus dan tamat? Adakah mereka itu sebenarnya mati ? Tidak! Tidak! Demi Allah tidak!! Maha Suci Tuhan yang menyaksikan orang-orang yang syahid dengan firman-Nya: "Walā taḥsabanna al-ladhīna qatilū fī sabīlillāh amwātan bal ahyā'u 'inda rabbihim yurzaqūn (al-'Imran 169).

Maksudnya: "Dan janglah engkau menyangka bahawa orang-orang yang terbunuh pada jalan Allah itu mati bahkan mereka itu hidup, di sisi Tuhan mereka diberi rezeki."

Şadaqa Allāhu al-'azīm – benarlah sebagaimana yang engkau katakan wahai Tuhan – bahwasanya syuhada-syuahada daripada Ikhwān al-Muslimīn yang menjadi korban Gamal Abdel Nasser, khususnya tiga sarjana itu, masih hidup, hidup di dalam ingatan dan hidup di dalam mengajar. Buah tangan mereka walaupun mereka telah dipancung dan dihancurkan, walaupun anggota-anggota mereka telah sebat dengan tanah namun Gamal Abdel Nasser tidak akan dapat menghapuskan benih yang ditanam oleh mereka dan Gamal Abdel Nasser akan menghadapi keadilan Ilahi yang tentu akan tiba kepadanya – inshā' Allāh

"Waman yazlim minkum nudhiqhu 'adhāban kabīrā" (al-Furqān ayat 19)

Maksudnya: "Dan barangsiapa di antara kamu berbuat aniaya maka kami akan rasakan kepadanya azab yang besar."